

太

函

集

太函集卷之三十九

新都汪道昆伯玉著

傳五首

太傅呂文安公傳

世祖揔攬萬幾倚辦二三執政執政至東甌愈重至上饒愈尊彼挾先資以億命中幸而遇合其獲丘陵次藉先容庶幾巷遇次則循資旅進有若貫魚儻然得之雄距高跼由前則難爲後由後則難爲前其相依也若輔車其相竭也若寒暑夫何以故患失則然乃若失得不入於心始終不渝其度則呂文安公一

人而已矣公故呂姓出營丘唐御史大夫延之禮部
侍郎渭右僕射溫殿中侍御史恭晉中書令琦宋太
師端博士荀中丞誨太守由誠評事億皆其本支由
青齊徙越新昌則自億始歷六世鎌爲別祖始遷餘
妣之新河歷三世而太祖興始籍德王爲李國初
法峻卒沿聲近而訛歷三世而生公瓊公珍公珍生
懋爲公瓊後公王父也懋生改以行義祀瞽宗是爲
公父及公以一品再考公瓊公珍懋改俱贈少保兼
太子太傅禮部尚書武英殿大學士曾王母蔡氏潘
氏王母胡氏俱贈一品夫人封母楊一品太夫人由

青齊歷五百年而興乃得名世弘治甲子六月朔太夫人樓居夢日卓午爍庭中赤光光四表既寤公乃生其後命曰瑞日樓則貴徵也太公故善謝文正則以負劒見公文正奇之斯其殷帝之首服也稍長執博士業文正益多公文夫夫國工異日者當出吾上館之家塾屬其子學士丕程督之學士入朝載之俱北紹介而見之費文憲亦以公輔器之戊子與計偕壬辰舉進士其年選庶吉士覆試得公 太上問庶吉士若而人誰可屬大事李文康密以公對業已志之心甲午第相材授國史檢討丁酉校 列聖御製

文集充經筵展書官既上程書出就南國子司業歲
久則以右中允攝南京翰林院轉左中允攝左春坊
丙午主試京師揭禮樂征伐自天子出爲首義錄呈
稱 旨簡在帝心戊申遞陞兩京國子監祭酒己酉
上命增置夾輔枚卜者六臣末䟽公名留十日不下
陰屬耳目跡六臣者何如人既下則惟南太宰及大
司成公以少詹事入閣辦事續修 大明會典充摠
裁尋 召入直廬庚戌陞吏部右侍郎東閣大學士
癸丑 上修輔臣功大學士本陞禮部尚書命禁中
乘船乘馬甲寅進太子太保兼文淵閣大學士丙辰

奉 旨攝吏部事考察部寺督撫諸大臣臺省諸郎
尋加少保兼武英殿大學士丁巳歷一品考進階光
祿大夫勲柱國兼太子太傅庚申歷六年考兼支大
學士俸加少傅 太上明如日月威如雷霆百官受
成莫不凜凜分宜耄矣胄子無良華亭肩隨深中重
發公以赤心上結 明主斷斷無他猶之清廟鑒刀
和而後斷庚戌秋八月虜薄郊關 上御永壽宮召
入直諸臣問方略臣本奏曰諸臣民仰望天顏久矣
請亟出視朝安中外心旣則以郊保僵尸瘡痍就死
請亟下令掩骼埋胔發賑蠲租京營故多廢軍請亟

更張以善後疏再入悉然納之咸寧侯鸞螫都御史商大節乃坐推避律比失機臣本上言此比附律也即罪在推避宜與臨敵殊科不聽既又言鸞調邊兵入衛以其習戰足當虜鋒今奏自部營兵以距前茅分發邊兵于邊外以斷後殿臣所未喻其意云何且督餉都御史隨地餉軍不爲不預鸞復要戶部載糒從征甚則秣馬許掠田禾諄之諄者也邊臣請互市廷臣持之 太上問輔臣云何臣本極言不可往虜猝入不及爲謀第一市以緩之固將集兵力大創之耳乃今兵力方集藉令虜入正宜張天討以振國威

犬羊無厭何示之弱也

上曰善悉罷市議毋開端

鸞敗誅奉

旨再議戎政癸丑徐邳大溢饑民輕爲

邪

上用公言命漕河二都御史併力疏濬發徐淮

倉糧四萬石兩淮餘鹽銀五萬兩遣刑部侍郎吳鵬

出賑之既而河復淤請遣祭川岳之神水乃就道省

臣建議請築外城則以時詘舉羸第自南關首事即

以一面經費三面可以類推

上數問輔臣不四面

非王制也于時諸執政及當事諸臣胥命工所公言

城南民物蕃庶或生戎心城之便今既裁南面衡萬

雉有奇自東西北折而屬都城傳諸堞計二十六里

而近工可計日而成餘三面工胥後命天壽山水爲患衝齧諸陵神路石橋有差上遣公視之特旨問狀對曰二水交衝故多潰決河勢環抱法中堪輿形勝不當更工費不當惜第濬河深廣下如建瓴可無患矣詔選民間子弟尚長公主待命者三人時中宮久虛命輔臣代選公首舉李和以進從之丙辰上命公主會試丁巳殿門災先築大朝門請減材圍徑差小即舊石燬第追琢新之其年大同歲豐一縑幾得一石請發度支銀十五萬預糴以佐軍興較之年終可省三倍職方郎唐順之言邊事上問邊

兵入衛起自何時臣本對曰 祖宗四征不庭皆發
京庫以往正德中江彬擁邊方扈南狩嘗見者以爲
不然自是邊兵果驕遂有大同之譟鸞受兵柄歲徵
邊兵入衛京陵屬薊兵入關督臣始奏留二軍防守
因循未徹遂以爲常 清問及之計深遠矣光祿寺
歲多冒破命舉較著者以聞臣本上言光祿故額二
十四萬歲贏其半或以佐司空乃今官掖搏節有常
歲費至三十六萬要之出入無藝其弊四端一傳取
之弊一關支之弊一門禁之弊一磁器之弊請復舊
制月遣一御史科察而籍奏之尚方所需必授符必

登籍以待歲會且法行自近臣等備員近臣常祿有
供大官有糈復以在直日饗三飯請罷之 上悉用
其言日損再飯先是已酉 莊敬太子立無何薨

上諱言儲言者見坐辛亥禮臣疏請公奉 旨陳言

自古帝王莫不蚤建太子將以正國本繫人心 祖

宗以來太子諸王年十五以上則冠婚出閣第本支

異禮必先正名且天授元良不可以往事槩論不納

壬子春 裕王始冠命大學士本贊冠明年請 二

王就宮中婚 上問故對曰名分未正不宜並出而

婚耦則上疑軋則下貳且先朝同在宮禁有 太后

有中宮有東宮今陛下骨肉親惟二王耳
悉出居外獨奈何自輕卒不納明年復請寢如初庚
申故左中允郭希顏上書謬以建立儲爲發語上
大怒傳上刑臣本上言小臣妄言建帝罪當死但
二王同居分邸寓內莫測淵衷其在天倫則聖心
密定矣徒以已酉爲鑒篤愛元良誠如所言一留
京一之國人心自定寧詎以人廢言上心然之即
諭輔臣景王當遵祖制令之國卒之翊穆考開
太平公誠社稷臣也辛酉五月太夫人以天年終
上下卹典並從優遣行人護送馳驛扶櫬歸葬公具

疏謝以哀毀聞洛河入舟 上下手札問疾賜冢子
元告扶持加意惓惓公自通籍以及居喪凡三十稔
都文學侍從者十有七都相位者十有三奉命一同
考會試一主鄉試四讀卷四分獻南郊再獻北郊六
祭帝社稷七遣祭先師雅言避名避利避權三者唯
恐其不去已端行卻步後其身而身先李文康故急
公不欲出公司業次當出者億東宮且立睥睨官僚
詭云汝立逝將將毋而南南所願也文康問公狀公
佯諾之司業業已當南面師懼不任耳於本何擇居
七年不調由由自如 上下相始得公下內閣議授

秩分宜密遣家監以告犒之十緡家監嘆之改少詹
事秩視大司成等庚戌舉進士賜宴南宮禮官則以
輔臣貴重而品在三以位次請分宜擬居三品之上
弗從既則擬以品爲差上徑命之居二品末得上
坐華亭入相後公者四年公引身下之遂躡公上其
後上孳孳求舊擁格亦猶分宜司隸擁公孤諸柄
具在肺腑公獨多息竟謝之及司隸暴亡周親內卻
公無所預概諸唐虞之揖讓不然乎哉先是島夷弄
兵諸郡縣盡城守縣故城江北而江南無城南市殷
殷什倍江北公紹介所部請夾江而城有如通州淮

安臨清倚角相守均之赤子寧詎置之度外邪佻者以爲譁不用命公謝曰吾未奉君命而與大役譁固當屬江南諸有位者上書下司空議既得請則胡督府董成迄告成功民不知役于是人人頌公功德祠事龍山語具華亭公新城記慈谿公生祠記中備矣公既家食察民間大不便者言之有司請履畝請均糧旣則徵徭銀罷優免由是租庸有調民力以紓直指使以其狀上之絜爲令穆考即位公請呂姓反本以志不忘屬冢子譜大宗躬修新昌萬十二公庚五公二墓凡諸祖墓各置祭田葺別祖祠改樹王

父墓門人逋以省方至爲公築館西郊乃延東越二
大方家聚徒講學公金口木舌壹稟於躬行季年構
齋居則以期齋自命蓋亦以先民自期耳寧詎以百
年期哉 今上嗣曆十有一年公登大耋 命監大
夫部使者以禮存問里中歲給夫月給米皆異數丙
戌公喪一品夫人夏寓書不佞道昆爲之立傳既得
卹典遣行人造墳丁亥諸子姓以初度稱觴公乃大
歡家慶無兩六之日忽不豫隣里聞室中樂聲公正
考終春秋八十有四 今上聞計爲之徹朝賜祭九
壇遣行人開壙合葬贈太傅謚文安廕一孫中書舍

人國恩厚矣公息子六任中書舍人者四長元進
祠部郎次允又次允進膳部郎叔子充任成均歷二
千石五子覺入太學六子魁授光祿署丞中文字謝
用模文正孫也年十五與計偕中道殤女以烈殉冢
孫胤昌天下士也故嘗北面不佞今守天官尚書郎
凡諸子姓婚姻具在碑志祠部當室復以公傳屬道
昆作者則少師少傅少宰三公述之詳矣道昆不佞
惡能贊一辭往爲郎三家鼎立公獨恢然相度休休
有容並以文事受知惟公相視莫逆卒之通及難老
三臺作朋要以分宜凶終華亭滋大惟公聲實純粹

即有口者無後言借曰讓名名歸之矣利權亡論也
有莘以阿衡相罔以寵利居成功往公由密勿而攝
端揆則阿衡事有莘不得專美矣

奚覺生傳

嘉靖中諸任子競豪舉必求醇厚爾雅者宜無若公
子元初呂文安公守諸生逆一品夫人夏是爲公子
母時王父見倍王母楊大夫人始踰耆丁亥母有身
王母夢王父與語吾兒當首舉子爲吾聞孫若第拊
之母子舍以也季秋二十有五日公子生王母擇有
乳者寢中與幼子同卧起既見之祚命名曰元始知

方從母奉王母就京師養幼而好弄公目攝之此兒
跳梁且不類諸大父曰否君未睹神駒邪即不馴一
舉千里馴直將爲驚耳惡用跋跋母訓曰母然亟折
節以安父母公子唯唯遂力學如成人從公之南雍
退食程業駸駸日益既冠公以調肅字之癸卯補縣
諸生再入試皆不偶初薛武進補督學公曹以其負
氣爲疵薛嚙之無所發則以相門翟氏爲口實壬子
罷勿入場調甫遂弃博士家言去而脩古癸丑被
恩命任中書舍人自言元父以密勿微勞賞延無似
元猶豚犬耳何敢饗 君父恩即異日無能自致青

雲祗讀父書以共子職公不可方命之謂何始拜命
給事西內歲賜尚方衣公入直禁中少出休沐調
甫當戶凡將迎報謁率中節文暇則檢中秘書及

先朝實錄以備顧問入奉王母若母務盡驩公得精
白一心無內顧既奉使入楚冊封龍陽王德安王樊
山王登太和山祝天子壽次王母壽次父母壽玄
君昭格金殿現五色光會倭入東南張甚胡督府故
習調甫具文武材延之幕中受方略既底績督府將
上調甫功調甫力謝之元以使事過父母之邦寧詎
敢冒行間賞餘姚故夾江而邑江以南未及城民居

故饒什倍江北相公移書所部亟城江南惡少焚公
家材木千章格不用命公歎曰葵猶能衛其足吾獨
不能爲州里衛邪屬調甫從諸鄉大夫上書得請而
後從事調甫歸與役會從徐令相度而城之城成邑
中始祠事公以報功德已未會試調甫充收掌試卷
官先白同事十七大夫今日之事公事也毋執苛禮
毋涉私交且甲辰有瑕咎在掌卷元不足惜無寧玷
諸名公諸大夫敬諾遂以次分卷無或參差每房應
中南卷若干北卷若干中卷若干揭定額于片牘中
無或增減既畢事閒無人言再考中書主諸侯王符

冊書券

景王之國金冊悉出手書王母弃世邸中

相公哭踊昏瞽凡諸大事悉命調甫任之時 上遣

大宗伯臨其喪 裕邸遣戚畹大金吾賜祭百司來

吊皆調甫應門人言太夫人得調甫爲冢孫太公之

夢有徵矣 上特賜告扶持馳驛南還先發驛書所

過毋庸祭奠舟至不艤厨傳悉以艇踐更津吏候人

殆不知相公且至且行矣歸從呂繕部奉 命治太

夫人喪遂攻形家言得兆龍山爲吉營葬賜金堇堇

相公悉出歲祿之美諸弟弗與聞公門人張直指按

浙中由中書起即以同官傾心調甫片言無所借資

嘗抵白岳謁玄君胡督府遣王將軍護夫人喪歸葬
時礦徒竊發出於潛王掩其羣坐刼輜重悉下之獄
調甫白之直指釋無辜者三百人蓋死者半之無及
矣大事畢入掌中書乙丑歷九年考進祠部郎元配
鄒累封孺人矣再使冊封魯世子卻餽如封楚時
則以父母高年幸而康食假以一日之養不啻三公
遂稱疾上書請得終養公出居郡則從之郡居邑則
從之邑鶴鳴子和不求聲聞朝夕承驩餘二十年所
公年八十今上並遣所部存問於家調甫相公周
旋亡不中禮旣受公命卜兆得新湖之姜山奉公周

覽以爲宜窀穸堂皇隊表儀從旣周且澤其費皆調
甫之自出諸弟亦弗與聞丙戌七夕母捐柩櫬調甫
逋絕逋甦水漿不入口者三日公飲泣曰母亡父亦
旦夕耳汝於而母孝矣而父身後將安主邪調甫遵
命茹哀乃始歆粥遣子胤基請 卹視秩典有加明
年相公以天年終則六月六日也調甫愈慟居後喪
踰前喪自以朞月而延二親不孝無死所矣季叔曰
事親三有禮而後孝子之身終生事居一焉祭葬皆
禮也調甫改慮以從季叔匍匐請 卹於朝祭葬贈
謚廕叙畢周九地庶幾無負其出入艱險則黃河覆

舟阜城遇寇皆有天幸 上遣行人開壙合葬已丑
元日禮成公生祠故在龍山未及舉祭抵所部下督
學議命有司春秋祠事有常復葬地祭田絜爲令既
則公時在郡戢山復構一祠于彼乎于此乎不可度
也矧可射也纂公年譜以志勿忘自卜地郡南官山
之陽以備封樹歲在寅卯郡縣舉鄉射禮逋逆調甫
爲介爲賓其行義具移督學書中列在惇史晚而聞
道有味乎列子之言生者不能不生化者不能不化
天地同歸于盡奚覺無一人自命曰奚覺生蓋歌陶
而有得者也泰茅氏曰莊生善通物故能齊物不悅

生不惡死故能齊死生夫非獨覺也與哉夫人必大
夢而後大覺耳調甫公孤主器出入金馬門執節齊
楚之都周咨遠覽公在與在公歸與歸宣力公家先
後四紀視諸相舍朝爲市而夕爲虛栩栩翩翩成然
覺矣季年自適其適庶幾靖節其人儻然而遇鄭圃
公家城千古猶旦暮也或曰逢世之佳公子然乎哉
隱君子周有道傳

正嘉之際論道者各主齊盟東越則王文成南粵則
湛文簡瞠乎文成之後者爲鄒文莊高陵永豐則與
文簡相師友自道術既裂專門者持兩端或主躬行

或求神解顧襲躬行者以貌襲神解者以言要以由中百不得一即庭內不能無間况望門而瞰者乎鄙人何知根于心之謂道合于一之謂道不以貌不以言藉令嘐嘐爲狂蹻蹻爲狷苟以是心至庶幾跂及於中行何以故由中故也潮有隱君子曰周乎先字克道學士大夫高其義具稱有道云正德中舉粵高第則趨函丈受業文簡之門于時及門者數十百人倡明體認天理之學有道聞之若發矇也退而就高陵呂仲木永豐呂汝德兩先生者揚摧之高陵嘗言精一執中本日用常行之事原自平易祇人以爲難

有道應聲曰固然其知者易之其不知者難之耳高陵避席曰克道遽及此邪則爲文簡誦之文簡躍然而喜斯文未喪吾黨有人及文簡入貳秩宗有道從永豐送之千里有道瞿瞿然適也將罷計偕永豐謂其倍于中庸乃就高陵決筴高陵歎曰行藏猶饑飽耳吾自知之吾自筴之如以吾腹而度他人之心懼旣飽而強飯有道于是乎歸隱卜居桃谿則以毋蕭春秋高第白首子舍乃築善養堂以侍晨夕躬帥楊恭人奉母歡築求志堂于西山聚徒講業跬步不出戶外竿牘不入公門考直方處士故祠事大宗有道

增葺之準家禮行宗法置田以贍聚食佐染盛嘗與
所善者姚世郁偕行姚及僮僕皆疫有道義不避難
生歿相依歿則殯之歸其櫬洪直指垣按粵從文簡
游有道出入與俱相悅滋甚伯子光陽應鄉試有道
堅自閉不與通畢試失光陽直指謝不敏有道自謂
非邪奚子終不以舐犢故于使者權歲壬寅有道艾
矣寢疾且革聞鄰有哭聲力疾援筆爲詩待期而盡
其詩曰日月有晦望草木有冬春榮枯理則然死以
反吾真蜉蝣有旦暮吾年已五旬但念生理順勿惡
死爲隣即革攝衣冠出正寢拜毋永訣毋幸無恙兒

從此辭顧命恭人婦在猶子在也悉出揮施篋笥分
給所親乃屏婦人得正而斃三子奉治命得兆西山
光陽奔文簡乞銘其質行可概見所部采郡縣博士
諸生黨正里胥議奉有道入祀賢宗人言有道通窮
達一死生隱則真隱儒則真儒根極於心無庸言貌
爲也借曰文簡之自出其殆青於藍乎海南歲侵島
夷大人桃谿不保三子負母而嬰縣城舊廬爲墟有
道手澤無餘燼矣其年母即世伯尋亡仲光命季光
錫暨冢孫篤棐奉母喪祔西山即文簡所志墓也三
年喪畢季舉孝廉北面永豐執弟子禮永豐知故業

及于兵燹出一二遺草授之歸居無何篤棐以明經
首舉相與校讐入梓纚纚乎入道之言及季對公車
最天官考贈父南京吏部文選司主事既守順德最
二千石贈父中憲大夫譽命洋洋率敦高尚予之

勅曰抱道之士予之

誥曰碩德名儒季由蜀郡歷

監司叅知政事博學礪行具文武林居然君子之子
矣司馬氏曰周之先居道州元公後也別祖曰梅叟
守潮而家焉有道祖述元公則世類以也宋大儒猶
五嶽元公其依宗與南粵之學昉於陳盛于湛世之
耳視者一爲玉一爲璠顧文簡得有道爲徒是足以

大吾門矣昔仲尼登鮑叔於管仲直以薦賢居多即一匡之功視片言誦矣彼其伏鵠卵者必魯雞也吾于文簡亦云

世叔十一府君傳

吾宗分門者三吾門爲上高祖而下宗曾大父伯鳴公曾大父而下宗世大父守仁公世大父生十一府君字文盛諱良榕蓋繼別之宗是曰世叔次世大父者爲先大父以不孝貴贈侍中世大母徐出路口蚤歲皆不宜子弘治甲子正月大父始舉先府君二月舉先叔十府君歲杪世大父舉十一府君一歲懸弧

者三三者皆人傑也吾家自曾大父以上率孝弟力田自大父亢賈始宗鹽筴世大父亦罷北賈與大父俱相與起甌括徙武林業駸駸起世大父則以中歲僅獨子宜蚤婚媒氏謂谿南吳翁女良第差少耳卜之上吉叔母年十五而笄世叔出武林從世大父受賈世大父若吾大父目三子皆能賈吾兩人者盍歸休吾父叔喜事而張其息日削世叔獨操故業斷斷無他歲計有餘資斧日益于時七穆並起世叔爲魁即不自用其長當大事能無懼已亥海大溢沒課鹽數十萬有奇諸賈以資斧亡皆號泣世叔自若或叩

之則曰天災流行亡于此則獲于彼乃今上游之賈三倍矣所得倍于所亡旣而果然諸賈大服邊商故僕忝率自逞齟南人脫有違言南人爭辟易世叔列邊商不法狀言之御史臺比出臺門羣黨攘臂以當世叔世叔大呼臺垣之右御史遣胥徒逮之既而同曹擁大眾赴市中邊商乃負世叔他日遇之道皆避道左脩故驩丙午曹御史忤按部中當掣期檄周山人監衡石駟僧醵諸賈三百金陰行覲事覺周急自解而首于曹覲者以醵金爲差列世叔名居首曹捕之急世叔亡旣亡諸父皆株連徑挺身入園土如坐

名即主則榕在諸兄弟無辜如坐所由則榕亦無罪
曹故驚捕者率九死一生會以奔喪行代者爲鄢御
史先屬袁司理按其事罪在醵者三覲者五要之其
投有郤山陰居二焉鄢以爲然世叔得免及冢子道
暎受賈視世叔愈工不策而居羸得過倍世叔則以
大司農歲入淮奉什二浙奉百二浙僅當淮之仿故
今上賈賈淮若第徙業于斯而翁從此歸矣歸則治
田宅浚陂池卜堪輿樹丘墓里有常征則先發邑有
大役則先受工工作紛起則神愈王氣愈充暇則塊
然如坐嘉石日召縫人一使司門梓人一使治木雅

言古人以宴安爲鴆毒固非虛言吾聞丁丁斧聲如
奏控楬祝啟藉第令墻面簡其無人則惟恐卧次子
道曄爲郡諸生尋入太學爲園十畝蒔花木百章世
叔怒持斧斷其楹何物狂且干吾家法冢子奉詔例
以貲授叅軍世叔叱之寧詎輕千乘之業而博一椽
先是道昆東游學禮世叔乃資餼脩既通籍數歸寧
每從世叔論事世叔笑曰兄子不解事僅持文墨得
官椎直少文蓋其天性顧其中長者故閭里鄉黨多
歸之老嬰未疾必扶掖而後行曳杖踈踈出入無倦
已卯十月喪吾叔十府君十二月喪世叔辛巳八月

魯先府君蓋父黨二十餘曹三府君皆以甲子降三
壽於是乎作朋矣二子將舉世叔喪旣屬道昆志墓
門之石卜期不得姑緩之孫一濛謂伯父方計宗盟
請爲大父立傳竊惟世大父修八尺昂昂若梁木高
十仞而無枝目光如隼鼻如狻猊敦朴葆真蓋葛天
氏之民也世叔狼胡虎視彊幹而聲揚即惴惴無華
猶之乎三代直道之遺民也冢子貌不若祖禰而心
計過之殆今雍梁宣曲之民耳顧世叔倍世大父之
業三冢子倍世叔之業七無亦受命於天而已豈惟
受命於形哉揆之天時世大父其始復也長日至矣

世叔其春乎冢子其夏乎一爲蟠根一爲本實一爲枝葉其所由來者漸矣概諸父作子述世叔其無憂乎

再從叔十六府君傳

諸父二十有一人皆七穆之自出王叔父守中公三息子長三府君次七府君皆吾伯父叔居季是爲十六府君叔諱良權文時字也王叔父從余王父賈鹽筴由甄括徙武林王叔父歸老于家三府君居中握算七府君居三衢職交易十六府君由海之江之衢之歛職轉輸時世父十一府君席故饒業滋起是三

府君者以材力勝駢肩及之時王叔父倡五宗新路寢私治賓舍一子舍三凡百供需不徵而集克家有子其力居多要以伯氏沉潛發必中的季氏善心計固無它腸叔齒居卑嚴事先司馬先司馬謂叔如其豁達大度弟不如兄如其與時逐得萬貨之情兄不如弟少相與習技擊先司馬冠軍叔歸而與從弟有違言不相下叔且擐衣從之矣從弟白先司馬狀先司馬善言平之陰讓叔曰吾故以若爲虛舟如之何觸石而輕嘗之也叔謝不敏由是愈益恂恂王叔母蔣棄栢棬諸母各持家秉時巫覡爲政諸子女時以

口腹爲殃神降輒命沙門修佛事入歛鹽價悉橐之家逋遣一老蒼頭負笥如漁者括常山如外府諸掌計亡敢誰何頃之喪伯氏武林叔代轉轂毋錢浸削贏得歲減有差而鼎足三分其費滋溢叔傷伯氏之不慙也內政之多門也漏卮不可取盈晷日不可復振也每操書計則瞪目勦勦遂投筆而深自傷吾力竭矣先是三府君即世內有煩言屬余居間諭以大義伯故長者無寧以苛細毛舉之至是諸子姓呶呶亦以歲會來討叔無以應屬余居間余察叔重爲邪無所問語其出入參若一語其功則季孟同叔聞而

有概于心兄子得我矣我之自我惟所命之不爲厚利而牟寧務苟得不爲名高而矯寧居下流飾巾待期則吾事也卒年五十有二爲嘉靖庚申叔母程出臨河乃今八十有一母黨之上壽也余雅言三府君有長者行後世不啻土崩天道果無知乎莫之致詰叔六舉子視吾黨最審長道照次道原次道敏亦在魯衛之間次道顯儒而次道晉次道弘六位正而龍興其五且夾輔之矣仁者有後故難爲前借曰無知爽于孟而徵于季說言乎允六子乃周則西成之卦也多男子則多累殆非伊耆氏之言華封人無庸

辨矣

太函集

卷之二十九

五十一

太函集卷之三十九

太函集卷之四十

新都汪道昆伯玉著

傳五首

許本善傳

嘉靖中歙人許穀上十三策先謁守令言疆事所尤
急者三歙附郭不城此國初制也頃島夷入浙列邑
悉城歙雖巖居其東略相唇齒且括徒盜金穴蟻聚
遂安即有不虞非城不守乃今百里子來以奉百姓
力足舉羸上兵伐謀請亟城歙歙連六郡矜保界以
壯金湯惟中丞直指歲周巡郡縣畫地而治雖在甸

服請置監司分部之歲久承平尺籍皆不爲賴徒餉
丁夫以代受甲率不教而弃之請置材官訓一旅以
備緩急越在草莽願爲肉食者謀守令心壯之格不
達歲乙卯倭突越圍西奔時太守陶公代朱公聞警
未發寇潛入界始徵衆登陴四顧城下無周隍民居
或傳諸堞朱下令亟夷版屋毋延火攻穀宣言曰寇
或薄城吾嬰城以守凡吾矢石所及內外皆爲吾藩
效死而與民守之古之道也智不及此未距守而先
毀夷脫有漏師示弱已甚陶公謂善地利不如人和
東門當虜之衝且近縣關關視城内等若能爲我守

東門乎穀奮身應曰能則擐短後操長兵先登以爲
民望朱目攝之曰壯士是嘗以三策干縣官適未用
其言以至於此寇深入乃遂五門史令以安車奉老
母躬挾圖籍呼東門穀堅閉如故今日之事軍事也
即君命有所不受何有令君穀智不逮挈瓶守不假
器令望門頓足曰君以吾不令也者而弃之吾無憾
有母且老死則何辜穀曰自列邑以首鼠敗謀寇至
不知所備彼其所虔劉者係累者夫非盡人之母邪
藉第令城成太母有安宅矣令仰天而誓曰吾悔不
用君言所不亟城者有如日穀乃啓門內令踧踖而

謝無謀穀盛軍容晝旌旗夜火鼓踐更者以期至失期有誅寇五十三人聞先聲而退二舍乃由間道出死陵薄秣陵而東京邑騷動陶朱二公舉酒相勞令始堅議歎城度地鳩工必得是夫爲植會行部以例授章服令得假穀便宜則予一騎出入郊關二胥持白挺前諸不用命者受杖穀曰此吾父母國不任者非夫經始議裁既議版築既議塹埴延袤若干里睥睨若干堵亭障若干所計費城旦若干緡令握算覆之不爽尺寸既告成事折節歸田先是父處士引年各以千金授三息子伯禾用積著傾郡仲即穀字本

善生而豐下魁然丈夫少以技擊豪即壯碩益輕捷
挺一劍作盤旋舞睨者莫得其瑕馬上橫槊絕塵而
奔挽五石弓無不中命人言乃公便便耳夫非戰勝
而肥者邪伯風仲曰吾汝起田間汝不問家人產吾
稼汝猶聊足以供春秋因自命曰春田而命仲曰秋
田日幾幾望其穫矣處士耆舉季子穉伯兄命之儒
仲負不羈且格猛噬嘗被酒卧嶺北虎以食犬後至
枕其脛而覺之起而熟視曰彼無忮心乘卧殺之不
武遂舍之去人以爲神比入少年場則比竹投壺謳
歌蹴踘無不中節雅言隆準公大度彼儒冠安足溺

哉故薄爲儒及謝縣大夫黜訓詁而理章句乃更爲
文公小學故不襲陳言行吟里中壹稟于自適將服
賈資斧不具伯予千金乃販繒航海而賈島中贏得
百倍舟薄浯澳羣盜悉掠之伯再予千金就近市賈
適歲凶民有殍悉發窖粟以賑磬磬伯三予千金無
德色仲乃擇地而賈賈就李之皂林仲始至諸三老
豪傑爭以牛酒勞之仲遞醕百觴會暑甚以厥暴炙
其年庚午當鷄火中其生與余同年同月同旬先余
五日耳行年未艾乃即首丘惜也仲從磐溪方處士
受室初不宜子乃進吳姬嫡子三長景曉以掾吏待

除無祿卽世次景曙更名師古故籍郡諸生頃投筆而錄塞上功封十萬戶搃舟師浯澳獲盜艘海外面縛百人掠仲舟者若而人不則其子或其黨也自言太公假手於當戶子敢不伏辜旣自浯澳徙中平則故鄉也讀父書舉遺筴儼若于其身親見之次景章行五庶子景星行二爲世父後主太子詹事簿次景晟行四次景晨行六嫡庶通舉間若一以文武顯者各一人大岳之胤居東門稱間右者首東門氏相公爲仲諸父伯仲皆嚴事之仲小饒供具相及庖廩及舉內史第一與計偕仲奉一縉爲取酒資業已垂橐

相公得之甚視伯有加師古自言不自意食先人之報于大父行二子始有今日仲即豪舉出入不倍于人倫少伯十餘年父視伯長季二十餘年子視季斯其以孝爲友不亦恂恂長者哉比閭里質成片言立解務倜儻矜已諾翩翩古國士風即當阨即歸真適有神明之應舟下浙江覆相屬者十有八仲施施自若若有神人維舟而濟通莊其沒皂林居人尸祝之以主土地應若祈嚮迄今香火不衰生爲俠士歿爲明神仲庶幾矣司馬氏曰劇孟匹夫條侯得之如得一敵國俠矣哉然以俠終則偏師也本善以布衣盡

策抑孰知其雌雄及三策畢行功見言信卒之引身而退一龍一蛇老氏有言不欲瑒瑒如玉碌碌如石則本善其人乎師古具文武材職在旗鼓軍志有進無退師古勉之臨事而懼好謀而成吾將以是爲教父

儒俠傳

昔韓非子排儒擊俠史遷述之余竊討其不然無寧舉一廢百文則苛細文而有緯則閔儒武則彊梁武而有經則節俠二者蓋相爲用何可廢哉余發跡郡諸生習同學方在宥及家食因在宥三丈夫子善方

景真景真結余仲氏爲肺腑親其人長者故嘗執博士業去而治四詩攻六書即修幹魁梧冠不危帶不博王父由聯墅遷巖鎮依近屬居焉父幼而瘖不能問家人產景真年踰舞象出儒入商問父故資則世父董出入幾盡矣父收餘燼將改圖慮景真少年或生得失則橐以授家監福歲取息供需景真脫婦裝益之賈齊魯毋汪故爲富翁婦齎用紛華浸久不鮮居嘗快快景真攬婦之腴以薦母母傷母心福載木棉二艘艤三河口會 上命開留河通運道截舟行一夕暴漲滔天數千艘皆葬魚腹俯仰相顧脫粟不

壓在宥故多景真此九方之國馬也乃召景真主鹽
筴厚糈之景真雅以然諾重諸交游喜任俠汪子木
五世祖墓矣其妣媵也藁葬累百年適子孫力持之
不得合葬子木憤無所發仰天而呼所不耐者非夫
第求劒俠以佐吾事景真撫其背曰無已甚此可以
禮法爭也即三尺劒無所用之幸而聽吾則三寸舌
足矣歸而伸大義諭諸適子孫陰卜吉期率諸力作
一夕爲之合葬即子木不知也諸適子孫皆以爲義
舉無間言鰥者程其章春秋二十有四景真具三十
金爲采逆胡氏女室之後程負三百金募舟濟上三

盜附舟東下次清河寓毒毒諸同舟席捲而遁既覺將自沈舟人言景舟故急君近在瓜渚比至則解衣衣之肱篋賙之于時景真以詘爲羸且垂橐矣頃以河舟之厄父四息則叔季未婚父與子壻汪孝廉壽之乃今惟新故二舍耳四子則已婚未婚各爲耦閭分之顧在巖鎮者新居爲肥故聯墅爲廢業即已婚者得巖鎮則助叔季納禽或未婚者得之無庸助矣景真乃得廢業卒助二弟婚即仲故以婚貸于鄰卒代歸責景真在事烝烝然厚于人倫義激則響應之無所恡胥命鉛槧將爲名高在宥日討而訓之若賈

人子耳良賈競競墨守毋耽曲藝毋昵廣交景真不用其言心隱隱有卻遂削歲楮禮意少衰夷醜不平將扶義以要其復景真不可無寧居其薄負伯疇昔之知從頌而辭結社如襖稱聲詩作書契傾其曹客言以景真之材朝發夕至足當千乘之客寧事刀錐景真謝曰伯固以此詬嚴耕寧詎甚而懟伯且父母在不敢以不肖之身徇人旣終毋喪北游臨清之滸市遇文學吳寵時國子嘉詒介文學而見景真退語文學曰魁然丈夫得時即駕文學曰善顧馭之者何如入浸假可當孫陽慎毋失斯人也肅之張秋奉千

金爲壽居三歲察其俗故偷悉收母子錢畢歸國子
文學問之故巖耕安敢從千金此中市猾恣睢商賈
輟至賈平則息滋薄姦數則禍易生無令它日傷吾
子之明且得過國子國子避席君固薄此邪嘉誼將
傾橐授君君主長蘆鹽筴此其羔雁耳景真高其義
且持兩端汪氏姊執景真衣泣俱下吾弟吾家柱石
安事遠遊在宥亦固留之俯首陳謝亦景真棄伯伯
固未嘗薄景真留無行復屬掌計及在宥即世諸子
三分之景真故在荊州將以賈茶入蜀資斧董董聞
者爭附之輦二千緡一日至時二弟碌碌人下召之

與俱歲在龍蛇羸得過當景真歸利浸減人人生心
既而入穿窬降熒惑什五歸亡何有之鄉景真長太
息曰昔魯仲連脩安平君政坐此耳遂奮身入蜀恢
復乃歸景真故豁達自如知人善任博徒葉宗魯小
有材首事以宗魯先卒得其力其後用程宗敏躁而
疏嘗構惡少相仇故焚積著千金以上景真無所問
愈益任之既又焚者踰三千難猶未已授館則沙市
顯者有司坐償屋價三百金遂下士師人言從此得
而甘心矣景真陰授方畧令藉景真名貸而償之聞
者嗷嗷有是哉其迂也景真深自念曰昔秦穆再免

孟明而霸孟明三報秦穆而伸使余不遇伯氏若國
子君賢於宗敏僅五十步耳荊州西度河出沙市故
老方鎡方鎡爲橋曰白雲橋旁築一庵曰白雲庵蓋
景真大父行也歲久而圯景真獨力更新及張太守
奉命䟽河削方氏署名攘爲公績太守去郡居民請
復之景真笑曰利在橋不在名且橋在名亡則亦未
嘗不利橋亡則利俱亡矣焉用名衆舉手加額曰此
長者之言也荊州俗有小神能爲淫蠱抗之則縱火
輕則揚沙蓋夔魍族也方氏儼舍故覆陶爲屋尸祝
之一或不虔燔其室吳子甲代至奉如初神以蠟月

當生辰比屋薦白雞鷺灑血以祀巫以竹卜得勝垞
乃行景真以爲矯誣端坐自若比中夜不得垞祈者
百端巫曰無將以新客不拜留行乃得兆衆彊景真
拜景真命之曰吾一拜而兆則有神拜下果然衆皆
咋指景真誓之曰今而後神無虐吾家祀事有常否
則淫昏吾滅而祀由是而神不擾事聞新都在宥謂
曰能敬之不若能遠之景真再至荊州移文神所遷
于白雲庵之隙地遂絕響無聞巖鎮面水之居從兄
弟受直而歸者半季以反目去之蜀將求他婚季婦
銜之無所歸咎將釋憾于冢婦梱內多惡聲景真歎

曰吾過也用婦言而戕手足無不祥大焉比中居室
兩楹兄弟具在故嘗請命司馬署曰有方違言起于
閨帷非禮也吾謹避之耳遂卜中市治一室余更署
曰立庭避舍而居即長舌無所煩矣季不受命將漁
色平康法言不從長傲自遂乃載重逃匿招之不歸
召者詰之則曰必欲相見毋計故費毋問今羸乃可
景真敬諾第召之來吾故無以爲家視在原猶在四
體乃今幸有託矣詎忍閱牆季信之歸而蒲伏謝過
嘗言禮之于人大矣趨庭之教于是乎皇皇遂以三
禮授長子斗符是爲仲氏甥也泰茅氏曰謂景真儒

宜非游夏謂景真俠宜非原嘗要之質有其文儒行彰而儒名掩矣乃若通有無急緩急解紛排難無論戚疏概諸中庸不越乎規矩準繩之外此之爲俠春秋所難由今以談謂之儒謂之俠可也謂之非儒謂之非俠可也謂之儒非儒俠非俠亦可也胡然而儒也胡然而俠也韓非子將焉傳之

聶少翁傳

聶氏望清江自漢丹陽太守始其功德著邦國洽幽明自漢迄今廟食勿絕子姓之英六七作世濟其靈或爲王或爲王太子皆既歿而封者也具在祀典比

屋社而稷之唐宋之交徙歟而真人出人主北面賜
號逍遙太師鍊師紹元則諸孫也其終始靈異具余
傳中少翁生清江蓋玉筭之冑也曾大父庭脩儒行
息子五長公播歷太僕丞太僕舉獨子時籍太學少
不宜子太僕三禱茅山夢茅君賜一嬰兒是當而尸
歸而少翁乃降與夢符既孤弱不勝輦輦近屬多子
直以其卵也者而礮之少翁則以祖禰皆慕長生厥
有世德浸假不死之藥可得庶幾乎骨可肉死可生
即骨立而死爲隣吾知免矣乃分遣家監詣名山求
異人居數年至者皆亡驗入學故得通微顯化真人

像少翁虔奉之齋中冬日一中歲士皂帽布衣踞石
當門有飢寒色少翁肅之入居齋居煬之爐擁之緇
且奉湯沐進机羞居浹辰得分遣求仙狀乃探囊出
靈藥一七餌少翁無何膚革充盈神駿駿王矣少翁
奉百金爲壽麾而屬舍人子悉製衣履散諸黃冠居
三年有嚴無怠乃始挾五氣之精撮三元之要屬耳
而授少翁戒以勿徇匪人勿泄天寶由此遇合當在
都門時方士恣睢負乘致寇母縻好爵人禍從之吾
從此往矣旣去異香滿室踰月不衰諸長老言此儻
然來耳若幸無恙弟亟以貲爲郎少翁乃待命大農

將受業函丈會有 詔開武英殿試中書諸當路率
推轂少翁籍名待次既遇先師都市申嚮者言若在
尚方幸一染指足矣無寧望君之腹後將噬臍時陶
秉一顧秩宗親近用事乃索少翁方藥進之齋宮且
曰縞帶何爲君不斬玉而玉至矣少翁力謝不可藉
令亡驗且干文成之誅師又言此中有至人二少翁
遇之白雲觀一曰願中一曰全陽全陽乃授刀圭發
最上一乘之秘授畢申戒如初少翁則以古之大隱
居朝吾其爲環中隱遂藉奉使歷嵩華取道漢中聞
郿縣故有王母祠去縣三舍皆鳥道乃挾僕夫往始

望險絕不容足至則陂陁可登日昃抵古祠一叟黃
冠端坐少翁稽首始進而與之言此玄君師謚毋祠
非王母也少翁膝席問道叟咲曰汝出仙胤汝師通
微顯化真人爲余石交故不避君耳口授真訣直指
天元悉發石函無復餘蘊授畢申戒如初乃斟以黃
精潘一升令僕夫削竹籤引庭柯各得一缶黎明乃
別辨色入郿居人謂信宿何留僅一夕耳詰朝再至
率履皆巉巖一菴頽然惟魁父之石離立舉首則墨
書雖有拱壁以先駟馬不如坐進此道末署玄玄師
書方外聞陽陽子以日者游日嚮卜數百錢輒賙不

給少翁遇之岱岳師事之師曰君既得師且得道吾祖素王二十八世孫也未嘗以道名吾友西蜀郁真人名守一號蘆菴其人受訣上仙足以發君多聞之所未逮吾悉授君矣申戒愈益諄諄既由北岳出燕關自削仕籍會司城籍紀寺人宅得通微顯化真人像其應甚奇其上有英廟璽書少翁始辨真人賜號玄玄師所友即先師也因佩師訓卜居通都以求藥品以固形骸從而周游求侶結侶求資乃自王侯卿相以及賔隸緇黃靡所不親自燕代幽并趙魏秦晉齊梁荆楚吳越甌閩百粵三川靡所不至至則懸

壺市藥一粒一緡遇諸顯者倍之顯而有急者又倍
客言疇昔散千金者豈非胡爲乎以一七而競錐刀少
翁咲曰吾無他技非此吾何以糊其口於四方吾不
貳價要之託此名以玩世不管陸沉手起千人貧乏
無所索嘗試諸臧獲或耄而孺或禿而髻京師膏劑
一比丘尼投里婦胎舉一赤子生三月而少翁至輒
揚聲呼少翁其家異之少令出家歸翊教寺星四周
無所遇將倦游則以太嶽太和山學道者之淵藪也
乃購地元君殿左築室八楹範金爲玄君像一尊四
將咸具各高七尺屬住持周進禮供奉之居七年供

諸方外往來者以億萬計嘗坐自然菴密室室中奉
純陽真人俄一異人入室中鬚一莖下垂及趾少翁
跽而問道異人長太息曰知之非難行之爲難又問
曰惟天無親親于有德凡三問異人盱衡詔曰子故
有三耳即七竅已得六通特未達一間吾當一呌顧
子之先師爲政無所事吾吾特舉其全耳授畢申戒
如初問姓名乃指室中像少翁九頓首不知所之太
僕故丞滁樂滁有佳山水小築烏衣巷少翁當室拓
而大之更築二區一爲仙史館一爲灌木園中園立
真人祠祠逍遙公也左爲黃庭舍右爲驪珠室水月

亭祠後爲梅雪樓則太僕有夙徵矣館授二子亦中
分之長曰多聞居錢居仲曰升聞居鏗居當是時舉
孫民正民至民立民玉凡四少翁自言吾以獨子將
受螯幸遇至人而生乃今子姓林林即不仙爲不死
矣少翁三入歛主函中拜真人祠復蜀源墓屬余討
舊史氏爲之立傳主碑墓既封且爲之立碣往余禮
少翁于白嶽意其年僅及彊既相與抵掌而論先
朝則先余詣闕下者十年矣即行年七十以上不
啻也少翁自言閱人多矣視余乃始莫逆於心余先
世亦出神明門戶之盛有若秦晉顧雲門玉笥之間

二三代起越國寥寥千載闕乎其未有聞先司馬負出世之資卒老人間世余小子少未聞道中年而學無生楊氏多岐漫無適主以是而希至道猶之以蚤負山要之惟余小子獨知少翁故爲少翁立傳

共程傳

在謚法執事堅固曰共共姜之所爲共其節固矣厥有從一不貳以苦節特聞歷二千年而有共程則吾宗王母行也程出忠壯公後王槐塘新都世家則二姓爲秦晉共程曾大父善吾大父皆贈侍郎父曰嗣恩受室貝白里吾宗曰時揚公遷巖鎮至恂公義甚

高嘗築舍以居貧宗務振人之急事聞所部書棹檣表其間恂子良玠以未疾痼終身家乃不造息子二伯鉢仲欽伯子逆共程獨當戶共程謂君家故受賈非賈何以治生遂解橐中裝佐伯子賈伯子曰善就近而賈海陽驟致千金者三稱良賈矣既復以質劑出入徙宛陵居數載一再倍之庶幾纂乃祖服無何而蔡亟歸就醫共程爲之贖湯藥禱神祇心力既殫幸保勿藥仲子代賈則與土著有違言釋業竟歸白家大人趣伯亟出會天寒大雨雪至柁嶺不能前乃杖枯竹測雪淺深蹠蹕而進中道疾復作至宛陵浸

深力疾而理歲會月要勞益甚自顧無起色輿疾而歸共程爲之贖湯藥禱神祇不遺餘力姑入間者因而生心凡諸伯子所需什不得一伯子怏怏彊顏解之越三年而伯子亡共程年二十有七二女呱呱耳逝將繫組以殉黃泉門內外親曲諭百端卒不應會母鄭來唁涕泣而告之曰良人見倍且無遺孤即自經亦若敖氏之鬼耳雖有內郤毋亂大謀異日者而叔再索得男其一可爲良人後良人無子而有子血食在焉視匹婦之諒徑庭矣共程唯唯大事乃襄日閉閣擁二女雛煦沫之凡百無所預姑主先入庭內

勃谿繼以惡聲殆不絕口而祀如綫絕矣恤緯何爲
共程不渝則殺其衣食不渝則毀其器用又不渝則
蹂躪其房皇共程度且不容乃因母黨而告諸宗長
老諸宗長老讓舅若非伯子無以爲家顧茲中興唯
伯子力不幸中道即世骨肉未寒忍逼而婦婦他人
吾宗安用彼舅亦爲之扼腕謝不及知于是諸宗長
老主盟爲舅畫筵面命仲子爲約約以六百緡爲贅
母女貲歲以子錢六之二給贅爲二女存其餘以待
嫁署赫蹠二一授仲子一授共程共程賴是少安則
以舅在及仲舉二子共程復籍母黨及諸宗長老請

于舅立仲次子一深以後良人里婦以其私問曰之
人也善忘疇子其子共程則曰未亡人可須臾無死
者爲良人世祀謀終不以釋憾故而舅良人此吾始
願也舅既沒共程一女殤姑諄如初復逼之嫁共程
誓自決諸宗長老同伐其謀歲給之貲減舅什八九
息女既字如約請治裝資仲子待應之卒不予共程
悉出伯子故橐僅成禮而行既爲嗣子一深納吳氏
婦舅遺家人產固當中分仲操利權給嫠之外無奇
羨一深呐呐事共程不啻所生比居庭姑婦由由安
也諸宗長老又言共程備嘗險阻艱難顧知大體徇

公義屋圯矣伯子將葺之而未遑旣水復侵圯益甚
共程歎曰嘻自我而失良人心不義遂脫簪珥以倡
近屬得二十緡是舉也堂構爲重刀布爲輕即丈夫
難矣申包胥之言曰人能勝天天定亦能勝人處士
以伯子興伯子以代仲子天使共程無從頌而死乃
竟不天卒奉母氏言將有待也及不得于姑氏即九
折其無如舅奪公議孤寡僅存已復中渝天未定耳
乃若不脩宿怨慨然立仲子之子而後之即哲婦或
有褊心宜不及此乃今有子有婦相忘于母子姑婦
之間天道昭昭久而後定非人力也不佞將爲近屬

譜故立傳而載之

叢睦汪母吳孺人傳

不佞道昆受命諸宗長老爲近屬譜凡諸內則皆得與聞叢睦出士明公鼎足而分若屈昭景大叔父以從事直 殿其名學忠受室谿南則吳孺人也歲壬辰秋八月幾望孺人以天年終女史布狀以告司書概舉其聖善將載諸宗祔孺人母儀婦順悉備大者無如廣胤以昌吾宗其始結縭年僅十五居七年所舉一女而殤自以孱然若將不勝懼不宜子越國之宗祀重矣無寧以一人故而闕之于是邁進如孺人

者二人相以內雍雍如也居有頃張姬一再索皆得男一索得女王姬再索皆女孺人率乳哺之襁褓之食之教之既而納冢婦黃介婦余余倍二子以唐繼長女歸吳太學繼芝無祿蚤世次女歸許舍人立功是爲執政少傅公子季女歸吳太學夷仲是爲余內兄子孺人視二子則子二婦則婦二孫則孫三女則女三甥則甥若子若婦若孫若女若甥恃孺人母之不啻其所自出鳴鳩之愛本之乎壹心孺人是已人言吾宗有造則孺人昌阜之長子一鵬以國子入鴻臚署次子一鸞籍郡諸生和氣致祥內德茂矣女史

又言孺人始饋特豚即奉姑湯藥姑目召新婦亟進
屏諸御人比執姑喪易不勝戚遇舅內嬖下姑一等
遇伯姒無違言伯氏故受博士詩中道而殞孺人拊
子子長矣則以孟當戶季習博士家言命之曰伯考
數奇所不足者非力學也孺子將瞑尔大父于九地
勉矣勿忘季及師門授幣授脩授庖授廩夜讀則命
焚膏烹茗通進飢授糈寒授爐季婦余亡孺人代撫
二息子有加愛里中素封相望從事公故饒孺人不
居其贏其自奉黻矣褻服猶衣大布從事公請易以
繒則謝曰吾不于其躬之美而美吾衣是殆斷樞衣

繡者耳吾將令後世師吾儉也寧詎作法于奢至若
賓客往來鄉隣緩急即家丈人爲政孺人率自庭內
辨應之黃氏姑故大家業中落析而獨爨孺人逆之
旁舍衣食之終其身且撫其孫爲之納婦里有程媼
嫠而貧孺人閔焉恤之遂依孺人以老及疾幾殆飾
巾待期豫以倉箱局鑰歸從事公啓而視之井井各
以其所迄于永訣訓季以正言吾方待孺子而大吾
門今不逮矣人子之所夙夜無忝尔所生孚而化翼
而飛生之屬也異日者決扶搖而上庶幾乎無忝哉
而毋暝矣司馬氏曰吾宗出潁川文王周公之後也

周南始關雎而亂麟趾褒然而首國風成周有道之
長由內治始螽斯樛木壹稟于閨門顧太姒之百斯
男本支具在孺人諸子女皆庶也屬之毛離之裏不
亦烝烝乎厚哉少傅公以詩起家深于詩者也素車
而出臨孺人喪聞余言而領之司馬氏是可與言詩
矣